

কি এমন হত !

রাজন নন্দী

ছুটির সকাল, কাঠ মিস্ত্রী সাজ করে দরজায়
আমি ঘুমে;

ঘুম ভেঙ্গে গেলে ভাবি - ভেতরেও কিছু সাজটাজ দরকারী।
খাবার ঘরে বাসী-টক তরকারী ফেলে দিলেও
ওটার নষ্ট গন্ধে তোমার ফেলে যাওয়া গন্ধ তখন ফেরারী।
সেটা ফিরে পেতে ছবি, চিঠির বাস্র তোলপাড়।
হঠাৎ হাত গলে পড়ে যেতে যেতে
খাবি খেয়ে উড়াল দিলে কোনও প্রবীণ চিরকুট
হাঁ হাঁ করে ছুটি, ছুটির সকালে।

কোথা থেকে যেন তাপদাহ আসে,

ছুটি কর্পূর;

মগজের ভাঁজে ভাঁজে ভোজ চলে স্মৃতির।

ওদিকে দরজায় সাজ সাজ!

মেঝেতে কি?

একটা পুরানো ছবিতে আমার যৌবন স্থির হয়ে আছে,
তুমিও; অথচ আমিই অস্থির !

এই ছুটির সকালে কি এমন হত নিহতের মত ঘুমালে!
শালার মিস্ত্রী!

